



INSTRUCCIÓN CONXUNTAS DA INTERVENCIÓN XERAL DA COMUNIDADE AUTÓNOMA E DA DIRECCIÓN XERAL DE PLANIFICACIÓN E ORZAMENTOS PARA A APLICACIÓN NO SECTOR PÚBLICO AUTONÓMICO DO PREVISTO NA DISPOSICIÓN ADICIONAL DÉCIMO CUARTA DA LEI 12/2015, DO 24 DE DECEMBRO, DE ORZAMENTOS XERAIS DA COMUNIDADE AUTÓNOMA DE GALICIA PARA O ANO 2016, POLA QUE SE APROBA UNHA RETRIBUCIÓN DE CARÁCTER EXTRAORDINARIO EN CONCEPTO DE RECUPERACIÓN DA PAGA EXTRAORDINARIA DE DECEMBRO DE 2012 AOS EMPREGADOS DO SECTOR PÚBLICO AUTONÓMICO DE GALICIA.

Primeira.- Aspectos xerais.

De conformidade co establecido na disposición adicional décimo cuarta da Lei 12/2015, do 24 de decembro, de orzamentos xerais da Comunidade Autónoma de Galicia para o ano 2016, pola que se aproba unha retribución de carácter extraordinario en concepto de recuperación da paga extraordinaria de decembro de 2012 aos empregados do sector público autonómico de Galicia, procederase ao aboamento das cantidades en concepto de recuperación dos importes efectivamente deixados de percibir como consecuencia da supresión da paga extraordinaria, así como da paga adicional de complemento específico ou pagas adicionais equivalentes, correspondentes ao mes de decembro de 2012, por aplicación do Real decreto lei 20/2012, do 13 de xullo, de medidas para garantir a estabilidade orzamentaria e de fomento da competitividade ao persoal ao servizo do sector público autonómico, definido no artigo 13 Seis da Lei 11/2011, do 26 de decembro, de orzamentos xerais da Comunidade Autónoma de Galicia para o ano 2012, afectado por dita supresión.

Durante o ano 2016 recuperarase a totalidade das cantidades pendentes de percibir por este concepto. Dita recuperación efectuarase en dúas fases:

- No mes de abril aboarase a parte proporcional correspondente a 46 días da paga extraordinaria, paga adicional do complemento específico ou pagas adicionais do mes de decembro de 2012. Naqueles casos nos que non tivera procedido o recoñecemento da totalidade da paga extraordinaria e adicional, os referidos 46 días reduciranse proporcionalmente ao cómputo de días que corresponderan.
- No mes de setembro aboarase a parte restante da paga extraordinaria, paga adicional do complemento específico ou pagas adicionais do mes de decembro de 2012 non recuperadas nos pagamentos anteriores.

A retribución de carácter extraordinario aboarase de acordo co procedemento e normas de cálculo establecidas na instrución segunda. En ningún caso, a liquidación realizada poderá superar a parte correspondente aos importes deixados de percibir como consecuencia da supresión da paga extraordinaria.

O aboamento das cantidades que correspondan como consecuencia da aplicación do disposto nesta instrución acreditaranse nas nóminas ordinarias dos meses de abril e setembro do ano 2016, agás para aqueles empregados para os que a habilitación correspondente non dispoña da



totalidade dos elementos formais necesarios, acreditándose neste caso na primeira nómina que sexa posible.

O literal que figurará nos recibos de nómina coincidirá co expresado na lei e será o seguinte “Recuperación da paga extraordinaria e adicional de decembro de 2012”.

Segunda.- Normas de cálculo.

O cálculo da cantidade a recuperar polos empregados públicos aos que se lles suprimira a paga extraordinaria, paga adicional de complemento específico e pagas adicionais equivalentes suprimidas no ano 2012 consistirá:

Na nómina do mes de abril en multiplicar polo 75,41 % a totalidade da cantidade suprimida e restarlle os importes xa recuperados por calquera circunstancia aplicando a seguinte fórmula:

$$R = (PE * 0,7541) - CS$$

Na nómina do mes de setembro en restar a totalidade da cantidade suprimida os importes xa recuperados por calquera circunstancia aplicando a seguinte fórmula:

$$R = PE - CS$$

Onde:

R: Importe da recuperación.

PE: Total importe suprimido no ano 2012

CS: Importes xa recuperados por calquera circunstancia.

Esta mesma fórmula se aplicará aos membros do Consello da Xunta, aos altos cargos e ao persoal eventual da Administración da Xunta de Galicia, aos membros do Consello de Contas de Galicia e do Consello Consultivo de Galicia e demais persoal a que se refire o artigo 2 da Lei 9/2012, do 3 de agosto, así como ao restante persoal ao servizo do sector público autonómico ao que se lle suprimira a catorceava parte das súas retribucións totais anuais.

Terceira.- Órgano que debe realizar o pagamento.

Os importes correspondentes aos empregados públicos que sigan en activo e conserven o mesmo destino que no momento da supresión serán aboados polas mesmas unidades que realicen o pago das súas nóminas.

Os importes correspondentes aos empregados públicos que sigan en activo pero non conserven o mesmo destino que no momento da supresión serán aboados, no ámbito da Administración da Comunidade Autónoma de Galicia, pola consellería, organismo autónomo ou entidade a través da que perciba as súas retribucións no mes de abril/setembro de 2016.



No caso de que o empregado público estivese prestando servizos na actualidade para unha administración distinta a aquela na que estaba no período a que corresponden a paga extraordinaria, paga adicional do complemento específico ou pagas adicionais equivalentes do mes de decembro de 2012, corresponde a esta última acordar, se é o caso, a devolución e facela efectiva.

Cando varias administracións suprimiran no ano 2012 a un mesmo empregado público parte das súas retribucións como consecuencia da aplicación do Real decreto lei 20/2012 deberán, cada unha delas, realizar a devolución que lle corresponda en función das cantidades satisfeitas polas mesmas.

Os importes correspondentes aos empregados públicos que non se encontren en activo con anterioridade ao primeiro día do mes de abril/setembro de 2016 serán aboadas polo órgano ao que lle correspondera satisfacer as pagas suprimidas logo de solicitude presentada ante ese órgano polos interesados no modelo que se xunta como anexo e que estará dispoñible na páxina <http://www.conselleriadefacenda.es/colectivos/empregados-publicos/orzamentos> .

Cuarta.- Imposto sobre a Renda das Persoas Físicas e cotizacións sociais.

Un.- As cantidades aboadas en concepto de recuperación dos importes suprimidos pola aplicación do Real decreto lei 20/2012, serán consideradas, aos efectos do IRPF, como rendementos do traballo obtidos no ano 2016 e polo tanto deben ser imputadas a este exercicio.

Dous.- As cantidades aboadas por este concepto incrementarán as bases de cotización á Seguridade Social cando, como consecuencia da supresión, no ano 2012 foran obxecto de minoración. En caso contrario a percepción destas cantidades non afectará á base reguladora da Seguridade Social.

Tres.- Os importes das cotas mensuais dos dereitos pasivos e de cotización a Muface e outras mutualidades de funcionarios non se verán afectadas polas cantidades que se abonen.

Sexta.- Instrución ao Centro Informático para a Xestión Tributaria, Económico-Financeira e Contable.

O CIXTEC xerará de oficio as listaxes cos perceptores para os que elabore as nóminas que estiveran en activo o último día do mes anterior ao sinalado para o pagamento, aos que lle sexan aplicables estas instrucións, coas contías que procede liquidar a cada un. Estas listaxes remitiranse ás consellerías, organismos e entidades para os efectos da súa posterior comprobación.

Co fin de contabilizar diferenciadamente o custo derivado desta recuperación deberase imputar o gasto aos mesmos subconceptos, en función do tipo de persoal, aos que se imputou o pago derivado da aplicación da disposición adicional décimo sétima da Lei 11/2014, do 19 de decembro, de orzamentos xerais da Comunidade Autónoma de Galicia para o ano 2015, isto é:

- Altos cargos 100.30
- Persoal de gabinete 110.30



- Persoal funcionario e estatutario 120.30 e 121.30
- Funcionarios en prácticas 124.30
- Persoal laboral fixo 130.30
- Persoal laboral temporal 131.30
- Persoal laboral temporal (profesores de relixión) 132.30
- Persoal laboral temporal indefinido 133.30
- Persoal laboral disposición transitoria 9ª Bis IV convenio. Sen sentenza 134.30
- Persoal investigador 136.30
- Outro persoal 140.30

Sétima.- Actuacións a desenvolver polos xestores de gasto

As habilitacións de persoal ou os correspondentes órganos competentes para a liquidación das nóminas comprobarán as listaxes remitidas polo CIXTEC e practicarán as retencións correspondentes nos casos nos que non concorran as circunstancias sinaladas nesta instrución.

Así mesmo, remitirán á Subdirección Xeral de Custos de Persoal da Dirección Xeral de Planificación e Orzamentos un certificado coas contías brutas por partida orzamentaria satisfeitas en cumprimento destas instrucións. Cando o órgano pagador non estea recollido dentro do perímetro de consolidación do orzamento, empregaranse as partidas da propia contabilidade de cada entidade.

Unha vez realizada a devolución da totalidade dos importes suprimidos no ano 2012 as habilitacións efectuaron os cálculos correspondentes para tramitar as transferencias de crédito que sexan necesario efectuar desde o concepto 170 *fondo de recuperación retributiva* ata os subconceptos aos que se imputaran efectivamente estes pagamentos.

Santiago de Compostela, 28 de marzo de 2016

A interventora xeral da Comunidade
Autónoma

O director xeral de Planificación e
Orzamentos

Almudena Chacón Pichel

Miguel Corgos Lopez-Prado

Secretarías Xerais Técnicas
Sr. Director do CIXTEC



ANEXO

SOLICITUDE DE PAGAMENTO DAS CANTIDADES EN CONCEPTO DE RECUPERACIÓN DA PAGA EXTRAORDINARIA DO MES DE DECEMBRO DE 2012 PARA O PERSOAL QUE NON ESTEA EN SITUACIÓN DE SERVIZO ACTIVO.

D./D^a. _____ con DNI
 _____ e domicilio para efectos de notificacións en
 _____,

teléfono: _____ /correo electrónico: _____.

Datos administrativos durante o período de devindicación da paga extraordinaria e da paga adicional de decembro de 2012:

Consellería/organismo: _____

Centro directivo: _____

Tipo de persoal:

Funcionario	<input type="checkbox"/>
Estatutario	<input type="checkbox"/>
Laboral	<input type="checkbox"/>
Alto Cargo	<input type="checkbox"/>

Outro: _____.

Solicita:

O aboamento das cantidades en concepto de recuperación dos importes deixados de percibir como consecuencia da supresión da paga extraordinaria, así como da paga adicional de complemento específico ou pagas adicionais equivalentes, correspondentes ao mes de decembro de 2012, e, para tal fin, achéganse os datos bancarios:

IBAN	Banco/Caixa	Sucursal	D.C.	Nº Conta
E S <input type="text"/> <input type="text"/>	<input type="text"/> <input type="text"/> <input type="text"/> <input type="text"/>	<input type="text"/> <input type="text"/> <input type="text"/> <input type="text"/>	<input type="text"/> <input type="text"/>	<input type="text"/> <input type="text"/> <input type="text"/> <input type="text"/> <input type="text"/> <input type="text"/> <input type="text"/> <input type="text"/> <input type="text"/> <input type="text"/>

_____, _____ de _____ 2016

Consellería/Entidade: _____